

Ирмосы канона Введения во храм

4 – й глас

1. Отверзу уста моя, / и наполнятся Духа, / и слово отрыгну Царице Матери, / и явлюся, светло торжествуя, // и воспою, радуясь, Тоя вхождение.
3. Твоя песнословцы, Богородице, / живой и независтный Источниче, / лик себе совокупльшия, духовно утверди, / в честнем вхождении Твоём // венцев славы сподоби.
4. Незследный Божий Совет / еже от Девы воплощения / Тебе, Вышняго, / пророк Аввакум, усмотряя, зовяше: // слава силе Твоей, Господи.
5. Ужасошася всяческая / в честнем вхождении Твоём: / Ты бо, Неискусобрачная Дево, / внутрь вошла еси в храм Божий, / якоже чистейший храм, / всем воспевающим Тя // мир подавающая.
6. Божественное сие и всечестное / совершающе празднество, / Богомудрии, Богоматере, / приидите, руками восплещим, // от Нея рождшагося Бога славим.
7. Не послужиша твари Богомудрии, / паче Создавшего, / но, огненное прещение мужески поправше, / радовахуся, поюще: // препетый отцев Господь и Бог, благословен еси.
8. Слыши, Отроковице, Дево Чистая, / да речет убо Гавриил / Совет Вышняго, древний, истинный: / буди к приятию готова Божию, / Тобою бо Невместимый с человеки поживе. / Тем и радуясь, вопию: // благословите, вся дела Господня, Господа.
9. Яко одушевленному Божию кивоту / да никакоже коснется рука скверных, / устне же верных Богородице немолчно, / глас Ангела воспевающе, с радостью да вопиют: // истинно вышши всех еси, Дево Чистая.